


En conexion cu celebracion di 20 aña di Caminda di Cruz

Parokia Santa Anna ta anuncia cu lo habri caminda principal dilanti Kapel di Alto



PAROKIA di Santa Ana ta desea di informa e comunidad local, proveedornan di benta, operadornan di tour y tur otro socionan relevante den e industria di turismo cu a base di un proceso di restauracion y proteccion di e tereno sagrado di Kapel di Alto Vista, regulacion nobo lo tuma efecto den e dia cu ta sigui.

Aunke e trabounan completo di restauracion no ta cla completamente, nos ta desea di comparti cu e caminda y acceso principal lo ta disponibel entrante Bierna Santo, 18 di april 2025 den conexion cu celebracion di 20 aña di Caminda di Cruz na Alto Vista.

Pa proteha e silencio, paz y ambiente spiritual di e area, y pa mehoracion di e experiencia di nos huespednan, e siguiente regulacion ta drenta den vigor:

Ubicacion nobo pa proveedornan di benta:

Proveedornan di benta cu ta opera normalmente dilanti di e Kapel a wordo relocalisa y no lo por traha of bende mas den e area dilanti di e Kapel. Nan a ricibi un ubicacion nobo y ta wordo orienta riba e regla cu ta aplica.

Regulacion nobo pa trafico:

- Solamente auto compact lo por sigui drenta y parkeer dilanti di e Kapel.
- UTV/ATV y busnan no lo por drenta ni parkeer dilanti di e Kapel.
- UTV/ATV lo haya su lugha asigna di parkeo na banda patras di e Kapel.
- Busnan lo haya su lugha asigna pa parkeo algun meter prome cu yega e Kapel.
- Autonan regular por sigui para dilanti of patras, segun espacio disponibel.

Importancia di e cambio:

E medidanan aki ta forma parti di un esfuerso mas

grandi, pa reestablece respet y trankilidad di e Kapel di Alto Vista cu ta tereno priva di Bisdom. Sigurando cu e ta keda fungi como un lugha di paz, oracion, refleho spiritual, y preserva nos herencia cultural.

Regla pa drenta e kapel:

Pa sigura respet y conducta apropia den e tereno sagrado, ta pidi pa sigui e siguiente regla:

- **Silencio:** Ta pidi pa papia cu stem abou of mantene keto
- **Bisti modestamente:** No drenta sin sapato, sin T-shirt/camisa, of cu paña inapropia
- **No ta permiti cuminda, bebida y ni humamento**
- **Musta bondad y respet pa tur hende**

Alto Vista Trails – Entrada nobo:

Nos ta informa tambe cu entrada p'e Alto Vista Trails awor lo ta disponibel na banda patras di e Kapel. Borch di indicacion lo wordo coloca pa guia e ruta nobo.

Mapa

Pa un miho orientacion, ta comparti un mapa visual cu e comunidad, operadornan di tour, y huespednan. E mapa ta ilustra e ruta nobo, lugha di parkeo asigna, entrada p'e trails, y zona prohibi.

Parokia Santa Anna ta gradici di curason e comunidad, operadornan di tour, huespednan y tur proveedor pa nan comprension y cooperacion durante e implementacion di e regulacion nobo. Hunto, nos ta traha pa preserva nos Kapel di Alto Vista – un simbolo di fe, cultura y union spiritual.

